



Na osnovu člana 8. Statuta Federalnog zavoda za zapošljavanje, a u skladu s odredbama Zakona o posredovanju u zapošljavanju i socijalnoj sigurnosti nezaposlenih osoba („Službene novine Federacije BiH“, br. 55/00, 41/01, 22/05 i 9/08), u vezi s Odlukom o proglašenju stanja nesreće uzrokovano pojavom koronavirusa (Covid 19) na području Federacije BiH („Službene novine Federacije BiH“, br. 21/20) i Odlukom o proglašenju nastanka stanja prirodne ili druge nesreće na teritoriji Bosne i Hercegovine („Službeni glasnik BiH“, br. 18/20), Upravni odbor Federalnog zavoda za zapošljavanje na telefonskoj sjednici održanoj dana 03.04.2020. godine donio je

## **ODLUKU**

### **o izmjeni Programa sufinansiranja zapošljavanja 2020 zbog proglašenog stanja nesreće uzrokovano pojavom koronavirusa na području Federacije BiH**

#### **I**

Onim poslodavcima, koji su se prijavili na javni poziv za Program sufinansiranja zapošljavanja 2020 (u daljnjem tekstu: Program) raspisan 28.02.2020. godine, a koji ispunjavaju uvjete Programa i već su, do dana početka primjene ove Odluke, u svrhu zaključenja ugovora o sufinansiranju zapošljavanja primili u radni odnos nezaposlene osobe, bit će omogućeno zaključivanje ugovora o sufinansiranju zapošljavanja.

#### **II**

S ciljem osiguranja dodatno potrebnih novčanih sredstava radi financiranja materijalne i socijalne sigurnosti nezaposlenih osoba, a koja obaveza proizilazi iz prioritetnih ciljeva Federalnog zavoda za zapošljavanje, a usljed vanrednih ekonomskih prilika i zastoja privrednih tokova u Federaciji BiH izazvanih pandemijom koronavirusa (Covid 19), odlaže se zaključivanje ugovora o sufinansiranju zapošljavanja izuzev ugovora iz točke I ove odluke.

Postupak po Programu nastaviti će se nakon prestanka vanrednih okolnosti, odnosno stanja nesreće kad i ako se utvrdi da su osigurana novčana sredstva za ostvarivanje materijalne i socijalne sigurnosti nezaposlenih osoba.

#### **III**

Ova odluka čini sastavni dio Programa sufinansiranja zapošljavanja 2020, usvojenog Odlukom Upravnog odbora Federalnog zavoda za zapošljavanje br. 01/1-45-792/20 od 18.2.2020. godine.

#### **IV**

Za izvršenje ove odluke zadužuju se Sektor za aktivnu politiku zapošljavanja i Sektor za finansije, svako iz domena svojih nadležnosti.

#### **V**

Federalni zavod za zapošljavanje će o sadržaju ove odluke, bez odlaganja, upoznati privredne subjekte putem svog web portala i kantonalnih/županijskih službi za zapošljavanje.

#### **VI**

Ova odluka stupa na snagu danom donošenja, a primjenjuje se nakon obavještanja privrednih subjekata o sadržaju iste.

## Obrazloženje

U svjetlu novononastalih okolnosti, odnosno pandemije koronavirusa (Covid 19) proglašene od strane Svjetske zdravstvene organizacije, slijedom čega je proglašeno stanje nesreće u Federaciji BiH odnosno prirodne ili druge nesreće u BiH, odlukama nadležnih entitetskih i državnih vlasti, evidentno je da su nastupili poremećaji u privredi. Također, odlukama Kriznog štaba Federacije BiH o zabrani rada, odnosno obavljanja djelatnosti brojnim privrednim subjektima zbog pandemije koronavirusa (Covid 19), a u cilju preveniranja širenja iste, izvršen je dodatan pritisak na privredu i privredne subjekte. Slijedom navedenog, za očekivat je povećan broj odnosno rast broja nezaposlenih osoba na području Federacije BiH. Sukladno prednjem, a kako je prioritetna uloga Federalnog zavoda za zapošljavanje osiguravanje novčanih sredstava za materijalnu i socijalnu sigurnost nezaposlenih osoba, i kako predmetne okolnosti, odnosno pandemiju koronavirusa (Covid 19) nije bilo moguće predvidjeti, a osiguranje materijalne i socijalne sigurnosti nezaposlenih osoba, u ovim okolnostima, predstavlja opći odnosno društveni interes, odlučeno je kao u dispozitivu.

**PREDSJEDNIK UPRAVNOG ODBORA**

**Zlatko Hadžimerović**

Broj: 01/1-45-792-1/20

Datum: 03.04.2020. godine

